

目次（科目依據太虛大師著瑜伽菩薩戒本講錄）

甲一、總勸勤學……………一

甲二、正說戒相 3

乙一、說戒相 2

丙一、四重戒 3

丁一、標徵名數

丁二、正明四重

丁三、釋他勝名 3……………二

戊一、明犯過失

戊二、明捨不捨……………三

戊三、示堪重受

丙二、諸輕戒	3
丁一、總令了知	
丁二、別顯戒相	2
戊一、障六度攝善	6
己一、障布施度	3
庚一、障財施戒	5
辛一、慳心不供三寶戒	
辛二、貪名利戒	5
辛三、不敬有德同法戒	
辛四、不應供受襯戒	6
辛五、不受重寶施戒	7

庚二、障法施戒……………八

庚三、障無畏施戒……………九

己二、障持戒度……………一〇

庚一、明遮罪 2

辛一、與聲聞共學戒

辛二、與聲聞不共學戒

庚二、別明性戒……………一二

辛一、殺生

辛二、不與取……………一三

辛三、邪淫……………一四

辛四、妄語

辛五、兩舌……………	一五
辛六、惡口……………	
辛七、綺語……………	一六
庚三、味邪命法戒……………	
庚四、掉動嬉戲戒……………	一七
庚五、倒說菩薩法戒……………	
庚六、不護雪譏謗戒……………	一八
庚七、不行處罰戒……………	一九
己三、障忍辱度 ⁴ ……………	
庚一、報復戒……………	
庚二、不悔謝戒……………	

庚三、不受懺戒……………二〇

庚四、懷忿不捨戒……………二一

己四、障精進度³

庚一、染心御眾戒

庚二、非時睡眠戒

庚三、虛談棄時戒……………二二

己五、障禪定度³

庚一、惰慢不求禪法戒

庚二、不除五蓋定障戒……………二三

庚三、貪味靜慮戒

己六、障般若度²……………二四

庚一、對於法者 5

辛一、不學小乘法戒

辛二、棄大向小戒

辛三、捨內學外戒……………二五

辛四、專習異論戒

辛五、不信深法戒

庚二、對於人者 3……………二六

辛一、愛恚讚毀戒

辛二、憍慢不聽正法戒……………二七

辛三、輕毀法師戒……………二八

戊二、障四攝利生 11

己一、不為助伴戒

己二、不往事病戒……………二九

己三、不為宣說障愛語戒……………三〇

己四、有恩不報戒

己五、患難不慰戒……………三一

己六、希求不給戒

己七、攝眾不施戒……………三二

己八、不隨心轉戒……………三三

己九、不隨喜讚揚戒……………三四

己十、不隨行威折戒

己十一、不隨現神力折攝戒……………三五

丁三、總明無犯·····	三六
乙二、明持悔	
乙三、明悔法 ² ·····	三七
丙一、對他懺除 ³	
丁一、上品纏犯應更受	
丁二、懺中品纏犯	
丁三、懺下品纏犯及餘違犯	
丙二、自誓懺除	
甲三、結應敬修·····	三八

瑜伽菩薩戒本

彌勒菩薩說 沙門玄奘奉詔譯

甲一、總勸勤學

若諸菩薩已受菩薩所受淨戒，應自數數專諦思惟，此是菩薩正所應作，此非菩薩正所應作。既思惟已，然後為成正所作業，當勤修學。又應專勵聽聞菩薩素怛纘藏，及以菩薩摩怛理迦，隨其所聞，當勤修學。

甲二、正說戒相³ 乙一、說戒相² 丙一、四重戒³ 丁一、標徵名數

若諸菩薩住戒律儀，有其四種他勝處法。何等為四？

丁二、正明四重

①若諸菩薩為欲貪求利養恭敬，自讚毀他，是名第一他勝處法。

②若諸菩薩現有資財，性慳財故，有苦、有貧、無依、無怙正求財者來現在前，不起哀憐而修惠捨；正求法者來現在前，性慳法故，雖現有法而不捨施，是名第二他勝處法。

③若諸菩薩長養如是種類忿纏，由是因緣，不唯發起麤言便息。由忿蔽故，加以手足、塊石、刀杖、捶打傷害損惱有情。內懷猛利忿恨意樂，有所違犯，他來諫謝，不受、不忍、不捨怨結，是名第三他勝處法。

④若諸菩薩謗菩薩藏，愛樂、宣說、開示、建立像似正法，於像似法，或自信解，或隨他轉，是名第四他勝處法。

丁三、釋他勝名³ 戊一、明犯過失

菩薩於四他勝處法，隨犯一種，況犯一切，不復堪能於現法中增長

攝受菩薩廣大菩提資糧，不復堪能於現法中意樂清淨，是即名為相似菩薩，非真菩薩。

戊二、明捨不捨

菩薩若用軟中品纏，毀犯四種他勝處法，不捨菩薩淨戒律儀。上品纏犯，即名為捨。若諸菩薩毀犯四種他勝處法，數數現行，都無慚愧，深生愛樂，見是功德，當知說名上品纏犯。非諸菩薩暫一現行他勝處法，便捨菩薩淨戒律儀；如諸苾芻犯他勝法，即便棄捨別解脫戒。

戊三、示堪重受

若諸菩薩由此毀犯，棄捨菩薩淨戒律儀，於現法中堪任更受，非不堪任。如苾芻住別解脫戒，犯他勝法，於現法中不任更受。

丙二、諸輕戒³ 丁一、總令了知

如是菩薩安住菩薩淨戒律儀，於有違犯及無違犯，是染非染，軟中上品，應當了知。

丁二、別顯戒相² 戊一、障六度攝善⁶ 己一、障布施度³ 庚一、障財施戒

5 辛一、慳心不供三寶戒

①若諸菩薩安住菩薩淨戒律儀，於日日中，若於如來，或為如來造制多所；若於正法，或為正法造經卷所，謂諸菩薩素怛纜藏、摩怛理迦；若於僧伽，謂十方界已入大地諸菩薩眾。若不以其或多或少諸供養具而為供養，下至以身一拜禮敬，下至以語一四句頌讚佛法僧真實功德，下至以心一清淨信隨念三寶真實功德，空度日夜，是名有犯有所違越。若不恭敬懶惰懈怠而違犯者，是染違犯。若誤失

念而違犯者，非染違犯。無違犯者，謂心狂亂。若已證入淨意樂地，常無違犯，由得清淨意樂菩薩，譬如已得證淨苾芻，恆時法爾於佛法僧以勝供具承事供養。

辛二、貪名利戒

②若諸菩薩安住菩薩淨戒律儀，有其大欲而無喜足，於諸利養及以恭敬生著不捨，是名有犯有所違越，是染違犯。無違犯者，謂為斷彼生起樂欲，發勤精進，攝彼對治，雖勤遮遏，而為猛利性惑所蔽，數起現行。

辛三、不敬有德同法戒

③若諸菩薩安住菩薩淨戒律儀，見諸耆長，有德可敬同法者來。憍慢所制，懷嫌恨心、懷恚惱心，不起承迎，不推勝座。若有他來語

言談論、慶慰、請問，僇慢所制，懷嫌恨心、懷恚惱心，不稱正理發言酬對，是名有犯有所違越，是染違犯。非僇慢制，無嫌恨心、無恚惱心，但由懶惰懈怠忘念無記之心，是名有犯有所違越，非染違犯。無違犯者，謂遭重病；或心狂亂；或自睡眠，他生覺想而來親附、語言談論、慶慰、請問；或自為他宣說諸法論議抉擇；或復與餘談論慶慰；或他說法論議抉擇屬耳而聽；或有違犯說正法者，為欲將護說法者心；或欲方便調彼伏彼，出不善處安立善處；或護僧制；或為將護多有情心，而不酬對，皆無違犯。

辛四、不應供受襯戒

④若諸菩薩安住菩薩淨戒律儀，他來延請，或往居家，或往餘寺，奉施飲食及衣服等諸資生具，僇慢所制，懷嫌恨心、懷恚惱心，不

至其所，不受所請，是名有犯有所違越，是染違犯。若由懶惰懈怠忘念無記之心，不至其所，不受所請，是名有犯有所違越，非染違犯。無違犯者，或有疾病；或無氣力；或心狂亂；或處懸遠；或道有怖；或欲方便調彼伏彼，出不善處安立善處；或餘先請；或為無間修諸善法，欲護善品令無暫廢；或為引攝未曾有義；或為所聞法義無退；如為所聞法義無退，論義抉擇當知亦爾；或復知彼懷損惱心，詐來延請；或為護他多嫌恨心；或護僧制，不至其所，不受所請，皆無違犯。

辛五、不受重寶施戒

⑤若諸菩薩安住菩薩淨戒律儀，他持種種生色、可染、末尼、真珠、琉璃等寶，及持種種眾多上妙財利供具，殷懃奉施，由嫌恨

心、或恚惱心，違拒不受，是名有犯有所違越，是染違犯，捨有情故。若有懶惰懈怠忘念無記之心，違拒不受，是名有犯有所違越，非染違犯。無違犯者，或心狂亂；或觀受已心生染著；或觀後時彼定追悔；或復知彼於施迷亂；或知施主隨捨隨受，由是因緣定當貧賈；或知此物是僧伽物、宰堵波物；或知此物劫盜他得；或知此物由是因緣多生過患，或殺、或縛、或罰、或黜、或嫌、或責，違拒不受，皆無違犯。

庚二、障法施戒

⑥若諸菩薩安住菩薩淨戒律儀，他來求法，懷嫌恨心、懷恚惱心，嫉妒變異，不施其法，是名有犯有所違越，是染違犯。若由懶惰懈怠忘念無記之心，不施其法，是名有犯有所違越，非染違犯。無違

犯者，謂諸外道伺求過短；或有重病；或心狂亂；或欲方便調彼伏彼，出不善處安立善處；或於是法未善通利；或復見彼不生恭敬，無有羞愧，以惡威儀而來聽受；或復知彼是鈍根性，於廣法教得法究竟深生怖畏，當生邪見，增長邪執，衰損惱壞；或復知彼法至其手，轉布非人，而不施與，皆無違犯。

庚三、障無畏施戒

⑦若諸菩薩安住菩薩淨戒律儀，於諸暴惡犯戒有情，懷嫌恨心、懷恚惱心，由彼暴惡犯戒為緣，方便棄捨，不作饒益，是名有犯有所違越，是染違犯。若由懶惰懈怠棄捨，由忘念故不作饒益，是名有犯有所違越，非染違犯。何以故？非諸菩薩於淨持戒身語意業寂靜現行諸有情所，起憐愍心，欲作饒益；如於暴惡犯戒有情，於諸

苦因而現轉者。無違犯者，謂心狂亂；或欲方便調彼伏彼，廣說如前；或為將護多有情心；或護僧制，方便棄捨，不作饒益，皆無違犯。

己二、障持戒度⁷ 庚一、明遮罪² 辛一、與聲聞共學戒

⑧若諸菩薩安住菩薩淨戒律儀，如薄伽梵於別解脫毗奈耶中，將護他故建立遮罪，制諸聲聞令不造作，諸有情類，未淨信者令生淨信，已淨信者令倍增長，於中菩薩與諸聲聞應等修學，無有差別。何以故？以諸聲聞自利為勝，尚不棄捨將護他行，為令有情未信者信，信者增長，學所學處，何況菩薩利他為勝。

辛二、與聲聞不共學戒

若諸菩薩安住菩薩淨戒律儀，如薄伽梵於別解脫毗奈耶中，為令聲

聞少事少業少希望住，建立遮罪，制諸聲聞令不造作，於中菩薩與諸聲聞不應等學。何以故？以諸聲聞自利為勝，不顧利他，於利他中少事少業少希望住，可名為妙；非諸菩薩利他為勝，不顧自利，於利他中少事少業少希望住，得名為妙。如是菩薩為利他故，從非親里長者、居士、婆羅門等及恣施家，應求百千種種衣服，觀彼有情有力無力，隨其所施，如應而受。如說求衣，求鉢亦爾。如求衣鉢，如是自求種種絲縷，令非親里為織作衣。為利他故，應蓄種種僑奢耶衣、諸坐臥具，事各至百；生色可染百千俱胝，復過是數，亦應取積。如是等中，少事少業少希望住制止遮罪，菩薩不與聲聞共學。安住淨戒律儀菩薩，於利他中，懷嫌恨心、懷恚惱心，少事少業少希望住，是名有犯有所違越，是染違犯。若由懶惰懈怠忘念

無記之心，少事少業少希望住，是名有犯有所違越，非染違犯。

庚二、別明性戒

⑨若諸菩薩安住菩薩淨戒律儀，善權方便，為利他故，於諸性罪少分現行，由是因緣，於菩薩戒無所違犯，生多功德。

辛一、殺生

謂如菩薩見惡劫賊，為貪財故欲殺多生，或復欲害大德聲聞、獨覺、菩薩，或復欲造多無間業。見是事已，發心思惟，我若斷彼惡眾生命，墮那落迦。如其不斷，無間業成，當受大苦。我寧殺彼墮那落迦，終不令其受無間苦。如是菩薩意樂思惟，於彼眾生，或以善心，或無記心，知此事已，為當來故，深生慚愧，以憐愍心而斷彼命。由是因緣，於菩薩戒無所違犯，生多功德。

辛二、不與取

又如菩薩見有增上增上宰官，上品暴惡，於諸有情無有慈愍，專行逼惱。菩薩見已，起憐愍心，發生利益安樂意樂，隨力所能，若廢若黜增上等位。由是因緣，於菩薩戒無所違犯，生多功德。又如菩薩見劫盜賊奪他財物、若僧伽物、窣堵波物，取多物已，執為己有，縱情受用。菩薩見已，起憐愍心，於彼有情發生利益安樂意樂，隨力所能，逼而奪取，勿令受用如是財故，當受長夜無義無利。由此因緣，所奪財寶，若僧伽物還復僧伽，窣堵波物還窣堵波，若有情物還復有情。又見眾主或園林主，取僧伽物、窣堵波物，言是己有，縱情受用。菩薩見已，思擇彼惡，起憐愍心，勿令因此邪受用業，當受長夜無義無利，隨力所能廢其所主。菩薩如是

雖不與取，而無違犯，生多功德。

辛三、邪淫

又如菩薩處在居家，見有女色現無繫屬，習淫欲法，繼心菩薩求非梵行。菩薩見已，作意思惟，勿令心恚多生非福，若隨其欲便得自在，方便安處令種善根，亦當令其捨不善業。住慈愍心，行非梵行。雖習如是穢染之法，而無所犯，生多功德。出家菩薩，為護聲聞聖所教誡，令不壞滅，一切不應行非梵行。

辛四、妄語

又如菩薩為多有情解脫命難、圜圜縛難、刖手足難、劓鼻、刖耳、剜眼等難，雖諸菩薩為自命難，亦不正知說於妄語，然為救脫彼有情故，知而思擇，故說妄語。以要言之，菩薩唯觀有情義利，非無

義利，自無染心，唯為饒益諸有情故，覆想正知而說異語。說是語時，於菩薩戒無所違犯，生多功德。

辛五、兩舌

又如菩薩見諸有情，為惡朋友之所攝受，親愛不捨。菩薩見已，起憐愍心，發生利益安樂意樂，隨能隨力說離間語，令離惡友，捨相親愛。勿令有情由近惡友，當受長夜無義無利。菩薩如是以饒益心說離間語，乖離他愛，無所違犯，生多功德。

辛六、惡口

又如菩薩見諸有情，為行越路非理而行，出麤惡語，猛利訶擯，方便令其出不善處安立善處。菩薩如是以饒益心，於諸有情出麤惡語，無所違犯，生多功德。

辛七、綺語

又如菩薩見諸有情，信樂倡伎、吟詠、歌諷，或有信樂王、賊、飲食、淫蕩街衢無義之論，菩薩於中皆悉善巧，於彼有情起憐愍心，發生利益安樂意樂，現前為作綺語相應種種倡伎、吟詠、歌諷、王、賊、飲食、淫衢等論，令彼有情歡喜引攝，自在隨屬，方便獎導，出不善處安立善處。菩薩如是現行綺語，無所違犯，生多功德。

庚三、味邪命法戒

⑩若諸菩薩安住菩薩淨戒律儀，生起詭詐，虛談現相，方便研求，假利求利，味邪命法，無有羞恥，堅持不捨，是名有犯有所違越，是染違犯。無違犯者，若為除遣生起樂欲，發勤精進，煩惱熾盛蔽

抑其心，時時現起。

庚四、掉動嬉戲戒

⑪若諸菩薩安住菩薩淨戒律儀，為掉所動，心不寂靜，不樂寂靜，高聲嬉戲，喧嘩紛聒，輕躁騰躍，望他歡笑。如此諸緣，是名有犯有所違越，是染違犯。若忘念起，非染違犯。無違犯者，若為除遣生起樂欲，廣說如前；若欲方便解他所生嫌恨令息；若欲遣他所生愁惱；若他性好如上諸事，方便攝受，敬慎將護，隨彼而轉；若他有情猜阻菩薩，內懷嫌恨，惡謀憎背，外現歡顏表內清淨，如是一切皆無違犯。

庚五、倒說菩薩法戒

⑫若諸菩薩安住菩薩淨戒律儀，起如是見，立如是論：菩薩不應

欣樂涅槃，應於涅槃而生厭背；於諸煩惱及隨煩惱不應怖畏而求斷滅，不應一向心生厭離，以諸菩薩三無數劫流轉生死，求大菩提。若作此說，是名有犯有所違越，是染違犯。何以故？如諸聲聞於其涅槃欣樂親近，於諸煩惱及隨煩惱深心厭離；如是菩薩於大涅槃欣樂親近，於諸煩惱及隨煩惱深心厭離，其倍過彼百千俱胝。以諸聲聞唯為一身證得義利勤修正行，菩薩普為一切有情證得義利勤修正行。是故菩薩當勤修集無雜染心，於有漏事隨順而行，成就勝出諸阿羅漢無雜染法。

庚六、不護雪譏謗戒

⑬若諸菩薩安住菩薩淨戒律儀，於自能發不信言重，所謂惡聲、惡稱、惡譽，不護不雪，其事若實而不避護，是名有犯有所違越，是

染違犯。若事不實而不清雪，是名有犯有所違越，非染違犯。無違犯者，若他外道；若他憎嫉；若自出家，因行乞行、因修善行謗聲流布；若忿蔽者；若心倒者，謗聲流布，皆無違犯。

庚七、不行處罰戒

⑭若諸菩薩安住菩薩淨戒律儀，見諸有情應以種種辛楚加行，猛利加行而得義利，護其憂惱而不現行，是名有犯有所違越，非染違犯。無違犯者，觀由此緣，於現法中少得義利，多生憂惱。

己三、障忍辱度⁴ 庚一、報復戒

⑮若諸菩薩安住菩薩淨戒律儀，他罵報罵，他瞋報瞋，他打報打，他弄報弄，是名有犯有所違越，是染違犯。

庚二、不悔謝戒

⑯若諸菩薩安住菩薩淨戒律儀，於他有情有所侵犯，或自不為彼疑侵犯，由嫌嫉心，由慢所執，不如理謝而生輕捨，是名有犯有所違越，是染違犯。若由懶惰懈怠放逸不謝輕捨，是名有犯有所違越，非染違犯。無違犯者，若欲方便調彼伏彼，出不善處安立善處；若是外道；若彼希望要因現行非法有罪，方受悔謝；若彼有情性好鬪諍，因悔謝時倍增憤怒；若復知彼為性堪忍，體無嫌恨；若必了他因謝侵犯，深生羞恥而不悔謝，皆無違犯。

庚三、不受懺戒

⑰若諸菩薩安住菩薩淨戒律儀，他所侵犯，彼還如法平等悔謝，懷嫌恨心，欲損惱彼，不受其謝，是名有犯有所違越，是染違犯。雖復於彼無嫌恨心，不欲損惱，然由稟性不能堪忍故不受謝，亦名有

犯有所違越，是染違犯。無違犯者，若欲方便調彼伏彼，廣說一切如前應知；若不如法不平等謝，不受彼謝，亦無違犯。

庚四、懷忿不捨戒

⑱若諸菩薩安住菩薩淨戒律儀，於他懷忿，相續堅持，生已不捨，是名有犯有所違越，是染違犯。無違犯者，為斷彼故生起樂欲，廣說如前。

己四、障精進度³ 庚一、染心御眾戒

⑲若諸菩薩安住菩薩淨戒律儀，貪著供事增上力故，以愛染心管御徒眾，是名有犯有所違越，是染違犯。無違犯者，不貪供侍，無愛染心管御徒眾。

庚二、非時睡眠戒

⑳若諸菩薩安住菩薩淨戒律儀，懶惰懈怠，耽睡眠樂、臥樂、倚樂，非時非量，是名有犯有所違越，是染違犯。無違犯者，若遭疾病；若無氣力，行路疲極；若為斷彼生起樂欲，廣說一切如前應知。

庚三、虛談棄時戒

㉑若諸菩薩安住菩薩淨戒律儀，懷愛染心談說世事，虛棄時日，是名有犯有所違越，是染違犯。若由忘念虛棄時日，是名有犯有所違越，非染違犯。無違犯者，見他談說，護彼意故，安住正念，須臾而聽；若事希奇，或暫問他，或答他問，無所違犯。

己五、障禪定度³ 庚一、惰慢不求禪法戒

㉒若諸菩薩安住菩薩淨戒律儀，為令心住，欲定其心，心懷嫌恨，

憍慢所持，不詣師所求請教授，是名有犯有所違越，是染違犯。懶惰懈怠而不請者，非染違犯。無違犯者，若遇疾病；若無氣力；若知其師顛倒教授；若自多聞，自有智力能令心定；若先已得所應教授，而不請者，無所違犯。

庚二、不除五蓋定障戒

②③若諸菩薩安住菩薩淨戒律儀，起貪欲蓋，忍受不捨，是名有犯有所違越，是染違犯。無違犯者，若為斷彼生起樂欲，發勤精進，煩惱猛利蔽抑心故，時時現行。如貪欲蓋，如是瞋恚、昏沈睡眠、掉舉惡作及與疑蓋，當知亦爾。

庚三、貪味靜慮戒

②④若諸菩薩安住菩薩淨戒律儀，貪味靜慮，於味靜慮見為功德，是

名有犯有所違越，是染違犯。無違犯者，若為斷彼生起樂欲，廣說如前。

己六、障般若度² 庚一、對於法者⁵ 辛一、不學小乘法戒

②5 若諸菩薩安住菩薩淨戒律儀，起如是見，立如是論，菩薩不應聽聲聞乘相應法教，不應受持，不應修學；菩薩何用於聲聞乘相應法教，聽聞受持，精勤修學。是名有犯有所違越，是染違犯。何以故？菩薩尚於外道書論精勤研究，況於佛語。無違犯者，為令一向習小法者捨彼欲故，作如是說。

辛二、棄大向小戒

②6 若諸菩薩安住菩薩淨戒律儀，於菩薩藏未精研究，於菩薩藏一切棄捨，於聲聞藏一向修學，是名有犯有所違越，非染違犯。

辛三、捨內學外戒

⑳若諸菩薩安住菩薩淨戒律儀，現有佛教，於佛教中未精研究，於異道論及諸外論精勤修學，是名有犯有所違越，是染違犯。無違犯者，若上聰敏；若能速受；若經久時能不忘失；若於其義能思能達；若於佛教如理觀察，成就俱行無動覺者，於日月中，常以二分修學佛語，一分學外，則無違犯。

辛四、專習異論、戒

㉑若諸菩薩安住菩薩淨戒律儀，越菩薩法，於異道論及諸外論研求善巧，深心寶翫，愛樂味著，非如辛藥而習近之，是名有犯有所違越，是染違犯。

辛五、不信深法、戒

②9 若諸菩薩安住菩薩淨戒律儀，聞菩薩藏，於甚深處、最勝甚深真實法義，諸佛菩薩難思神力，不生信解，憎背毀謗，不能引義、不能引法，非如來說，不能利益安樂有情，是名有犯有所違越，是染違犯。如是毀謗，或由自內非理作意，或隨順他而作是說。若諸菩薩安住菩薩淨戒律儀，若聞甚深最甚深處，心不信解，菩薩爾時應強信受，應無諂曲，應如是學：我為非善，盲無慧目，於如來眼隨所宣說，於諸如來密意語言而生誹謗。菩薩如是自處無知，仰推如來，於諸佛法無不現知等隨觀見。如是正行，無所違犯。雖無信解，然不誹謗。

庚二、對於人者³ 辛一、愛恚讚毀戒

③0 若諸菩薩安住菩薩淨戒律儀，於他人所有染愛心，有瞋恚心，自

讚毀他，是名有犯有所違越，是染違犯。無違犯者，若為摧伏諸惡外道；若為住持如來聖教；若為方便調彼伏彼，廣說如前；或欲令其未淨信者發生淨信，已淨信者倍復增長。

辛二、憍慢不聽正法戒

③①若諸菩薩安住菩薩淨戒律儀，聞說正法論義抉擇，憍慢所制，懷嫌恨心、懷恚惱心，而不往聽，是名有犯有所違越，是染違犯。若為懶惰懈怠所蔽而不往聽，非染違犯。無違犯者，若不覺知；若有疾病；若無氣力；若知倒說；若為護彼說法者心；若正了知彼所說義，是數所聞所持所了；若已多聞，具足聞持，其聞積集；若欲無間於境住心，若勤引發菩薩勝定；若自了知上品愚鈍，其慧鈍濁，於所聞法難受難持，難於所緣攝心令定，不往聽者，皆無違犯。

辛三、輕毀法師戒

③②若諸菩薩安住菩薩淨戒律儀，於說法師故思輕毀，不深恭敬，嗤笑調弄，但依於文，不依於義，是名有犯有所違越，是染違犯。

戊二、障四攝利生¹¹ 己一、不為助伴戒

③③若諸菩薩安住菩薩淨戒律儀，於諸有情所應作事，懷嫌恨心、懷恚惱心，不為助伴。謂於能辦所應作事，或於道路若往若來，或於正說事業加行，或於掌護所有財寶，或於和好乖離諍訟，或於吉會，或於福業，不為助伴，是名有犯有所違越，是染違犯。若為懶惰懈怠所蔽，不為助伴，非染違犯。無違犯者，若有疹疾；若無氣力；若了知彼自能成辦；若知求者自有依怙；若知所作能引非義，能引非法；若欲方便調彼伏彼，廣說如前；若先許餘為作助伴；若

轉請他有力者助；若於善品正勤修習，不欲暫廢；若性愚鈍，於所聞法難受難持，如前廣說；若為將護多有情意；若護僧制，不為助伴，皆無違犯。

己二、不往事病戒

③④若諸菩薩安住菩薩淨戒律儀，見諸有情遭重疾病，懷嫌恨心、懷恚惱心，不往供事，是名有犯有所違越，是染違犯。若為懶惰懈怠所蔽，不往供事，非染違犯。無違犯者，若自有病；若無氣力；若轉請他有力隨順令往供事；若知病者有依有怙；若知病者自有勢力，能自供事；若了知彼長病所觸，堪自支持；若為勤修廣大無上殊勝善品；若欲護持所修善品令無間缺；若自了知上品愚鈍，其慧鈍濁，於所聞法難受難持，難於所緣攝心令定；若先許餘為作供

事。如於病者，於有苦者為作助伴欲除其苦，當知亦爾。

己三、不為宣說障愛語戒

③⑤若諸菩薩安住菩薩淨戒律儀，見諸有情為求現法、後法事故，廣行非理，懷嫌恨心、懷恚惱心，不為宣說如實正理，是名有犯有所違越，是染違犯。若由懶惰懈怠所蔽，不為宣說，非染違犯。無違犯者，若自無知；若無氣力；若轉請他有力者說；若即彼人自有智力；若彼有餘善友攝受；若欲方便調彼伏彼，廣說如前；若知為說如實正理，起嫌恨心；若發惡言；若顛倒受；若無愛敬；若復知彼性弊慳戾，不為宣說，皆無違犯。

己四、有恩不報戒

③⑥若諸菩薩安住菩薩淨戒律儀，於先有恩諸有情所，不知恩惠，不

了恩惠，懷嫌恨心，不欲現前如應酬報，是名有犯有所違越，是染違犯。若為懶惰懈怠所蔽，不現酬報，非染違犯。無違犯者，勤加功用無力無能不獲酬報；若欲方便調彼伏彼，廣說如前；若欲報恩而彼不受，皆無違犯。

己五、患難不慰戒

③⑦若諸菩薩安住菩薩淨戒律儀，見諸有情墮在喪失財寶、眷屬、祿位難處，多生愁惱。懷嫌恨心，不往開解，是名有犯有所違越，是染違犯。若為懶惰懈怠所蔽，不往開解，非染違犯。無違犯者，應知如前於他事業不為助伴。

己六、希求不給戒

③⑧若諸菩薩安住菩薩淨戒律儀，有飲食等資生眾具，見有求者正

來希求飲食等事，懷嫌恨心、懷恚惱心，而不給施，是名有犯有所違越，是染違犯。若由懶惰懈怠放逸不能施與，非染違犯。無違犯者，若現無有可施財物；若彼希求不如法物、所不宜物；若欲方便調彼伏彼，廣說如前；若來求者王所匪宜，將護王意；若護僧制，而不惠施，皆無違犯。

己七、攝眾不施戒

③9 若諸菩薩安住菩薩淨戒律儀，攝受徒眾，懷嫌恨心，而不隨時無倒教授、無倒教誡。知眾匱乏，而不為彼從諸淨信長者、居士、婆羅門等，如法追求衣服、飲食、諸坐臥具、病緣醫藥、資身什物，隨時供給。是名有犯有所違越，是染違犯。若由懶惰懈怠放逸，不往教授、不往教誡，不為追求如法眾具，非染違犯。無違犯者，若

欲方便調彼伏彼，廣說如前；若護僧制；若有疹疾；若無氣力不任加行；若轉請餘有勢力者；若知徒眾世所共知，有大福德，各自有力求衣服等資身眾具；若隨所應教授教誡皆已無倒教授教誡；若知眾內有本外道，為竊法故來入眾中，無所堪能，不可調伏，皆無違犯。

己八、不隨心轉戒

④0若諸菩薩安住菩薩淨戒律儀，懷嫌恨心，於他有情不隨心轉，是名有犯有所違越，是染違犯。若由懶惰懈怠放逸不隨其轉，非染違犯。無違犯者，若彼所愛非彼所宜；若有疾病；若無氣力不任加行；若護僧制；若彼所愛雖彼所宜，而於多眾非宜非愛；若為降伏諸惡外道；若欲方便調彼伏彼，廣說如前，不隨心轉，皆無違犯。

已九、不隨喜讚揚戒

④1 若諸菩薩安住菩薩淨戒律儀，懷嫌恨心，他實有德不欲顯揚，他實有譽不欲稱美，他實妙說不讚善哉，是名有犯有所違越，是染違犯。若由懶惰懈怠放逸不顯揚等，非染違犯。無違犯者，若知其人性好少欲，將護彼意；若有疾病；若無氣力；若欲方便調彼伏彼，廣說如前；若護僧制；若知由此顯揚等緣，起彼雜染憍舉無義，為遮此過；若知彼德雖似功德，而非實德；若知彼譽雖似善譽，而非實譽；若知彼說雖似妙說，而實非妙；若為降伏諸惡外道；若為待他言論究竟，不顯揚等，皆無違犯。

已十、不隨行威折戒

④2 若諸菩薩安住菩薩淨戒律儀，見諸有情應可訶責、應可治罰、應

可驅擯。懷染汙心而不訶責；或雖訶責，而不治罰如法教誡；或雖治罰如法教誡，而不驅擯。是名有犯有所違越，是染違犯。若由懶惰懈怠放逸，而不訶責乃至驅擯，非染違犯。無違犯者，若了知彼不可療治、不可與語，喜出麤言，多生嫌恨，故應棄捨；若觀待時；若觀因此鬪訟諍競；若觀因此令僧誼雜，令僧破壞；知彼有情不懷諂曲，成就增上猛利慚愧，疾疾還淨，而不訶責乃至驅擯，皆無違犯。

己十一、不隨現神力折攝戒

④③若諸菩薩安住菩薩淨戒律儀，具足成就種種神通變現威力，於諸有情應恐怖者能恐怖之，應引攝者能引攝之，避信施故，不現神通恐怖引攝，是名有犯有所違越，非染違犯。無違犯者，若知此中諸

有情類多著僻執，是惡外道，誹謗賢聖，成就邪見，不現神通恐怖引攝，無有違犯。

丁三、總明無犯

又一切處無違犯者，謂若彼心增上狂亂，若重苦受之所逼切，若未曾受淨戒律儀，當知一切皆無違犯。

乙二、明持悔

若諸菩薩從他正受戒律儀已，由善清淨求學意樂、菩提意樂、饒益一切有情意樂，生起最極尊重恭敬，從初專精不應違犯；設有違犯，即應如法疾疾悔除，令得還淨。如是菩薩一切違犯，當知皆是惡作所攝，應向有力於語表義能覺能受小乘大乘補特伽羅，發露悔滅。

乙三、明悔法² 丙一、對他懺除³ 丁一、上品纏犯應更受

若諸菩薩以上品纏違犯如上他勝處法，失戒律儀，應當更受。

丁二、懺中品纏犯

若中品纏違犯如上他勝處法，應對於三補特伽羅，或過是數，應如發露除惡作法，先當稱述所犯事名，應作是說：長老專志。或言：大德！我如是名，違越菩薩毗奈耶法，如所稱事犯惡作罪。餘如苾芻發露悔滅惡作罪法，應如是說。

丁三、懺下品纏犯及餘違犯

若下品纏違犯如上他勝處法，及餘違犯，應對於一補特伽羅發露悔法，當知如前。

丙二、自誓懺除

若無隨順補特伽羅可對發露，悔除所犯，爾時菩薩以淨意樂，起自誓心：我當決定防護當來，終不重犯。如是於犯，還出還淨。

甲三、結應敬修

復次！如是所起諸事菩薩學處，佛於彼彼素怛纜中隨機散說，謂依律儀戒、攝善法戒、饒益有情戒。今於此菩薩藏摩怛理迦，綜集而說，菩薩於中應起尊重，住極恭敬，專精修學。

瑜伽菩薩戒本

菩薩戒羯磨文（出瑜伽師地論本地分中菩薩地）

彌勒菩薩說 沙門玄奘奉詔譯

受戒羯磨第一

若諸菩薩欲學菩薩三聚淨戒，或是在家，或是在出家，先於無上正等菩提發弘願已，當審訪求同法菩薩，已發大願，有智有力於語表義能授能開，於如是等功德具足勝菩薩所，先禮雙足，偏袒右肩，膝輪據地，合掌恭敬，如是請言：「大德憶念，我如是名，於大德所乞受一切菩薩淨戒。唯願須臾不辭勞倦，哀愍聽授。」（第二、第三亦如是說）既作如是無倒請已，偏袒右肩，恭敬禮拜，供養十方三世諸佛世尊，已入大地、得大智慧、得大神通諸菩薩眾，現前專念彼諸功德，生殷淨心。

若諸菩薩欲授菩薩菩薩戒時，先應為說菩薩法藏摩呬理迦，菩薩學處及犯處相，令其聽受。以慧觀察自所意樂，堪能思擇受菩薩戒，非唯他勸，非為勝他。當知是名堅固菩薩，堪受菩薩淨戒律儀，以受戒法如應正授。其受戒菩薩，復於彼有智有力勝菩薩所，謙下恭敬，膝輪據地，對佛像前合掌請言：「唯願大德，哀愍授我菩薩淨戒。」如是請已，專念一境，長養淨心，我今不久當得無盡無量無上大功德藏。即隨思惟如是事義，默然而住。

爾時有智有力菩薩，於彼能行正行菩薩，以無亂心，若坐若立，而作是言：「汝如是名善男子聽，汝是菩薩不？」彼應答言：「是。」「發菩提願未？」應答言：「已發。」自此已後，應作是言：「汝如是名善男子聽，汝等今者欲於我所受諸菩薩一切學處，

受諸菩薩一切淨戒，謂律儀戒、攝善法戒、饒益有情戒。如是學處、如是淨戒，過去一切菩薩已具，未來一切菩薩當具，普於十方現在一切菩薩今具。於是學處、於是淨戒，過去一切菩薩已學，未來一切菩薩當學，現在一切菩薩今學。汝能受不？」答言：「能受。」能授菩薩第二、第三亦如是說。能受菩薩第二、第三亦如是答。如是受已，能受菩薩不起于座，能授菩薩對佛像前，普於十方現住諸佛及諸菩薩，恭敬供養，頂禮雙足，作是白言：「仰啟十方無邊無際諸世界中諸佛菩薩，今於此中現有某名菩薩，於我某菩薩所，乃至三說受菩薩戒，我為作證。唯願十方無邊無際諸世界中諸佛菩薩，第一真聖，於現不現一切時處，一切有情皆現覺者，於此某名受戒菩薩亦為作證。」第二、第三亦如是說。如是受戒羯磨畢

竟，從此無間，普於十方無邊無際諸世界中現住諸佛，已入大地諸菩薩前，法爾相現。由此表示，如是菩薩已受菩薩所受淨戒。

爾時十方諸佛菩薩，觀是菩薩法爾之相，生起憶念，由憶念故，正智見轉，由正智見，如實覺知，某世界中某名菩薩，某菩薩所正受菩薩所受淨戒，一切於此受戒菩薩，如子如弟，生親善意，眷念憐愍。由佛菩薩眷念憐愍，令是菩薩希求善法，倍復增長，無有退減。如是名為受菩薩戒啟白請證。

若諸菩薩住戒律儀，有其四種他勝處法。何等為四？若諸菩薩為欲貪求利養恭敬，自讚毀他，是名第一他勝處法。若諸菩薩現有資財，性慳財故，有苦、有貧、無依、無怙正求財者來現在前，不起哀憐而修惠捨；正求法者來現在前，性慳法故，雖現有法而不給

施，是名第二他勝處法。若諸菩薩長養如是種類忿纏，由是因緣，不唯發起麤言便息，由忿蔽故，加以手足、塊石、刀杖、捶打傷害損惱有情；內懷猛利忿恨意樂，有所違犯他來諫謝，不受、不忍、不捨怨結，是名第三他勝處法。若諸菩薩謗菩薩藏，愛樂、宣說、開示、建立像似正法，於像似法，或自信解，或隨他轉，是名第四他勝處法。如是名為菩薩四種他勝處法。菩薩於四他勝處法，隨犯一種，況犯一切，不復堪能於現法中增長攝受菩薩廣大菩提資糧，不復堪能於現法中意樂清淨，是即名為相似菩薩，非真菩薩。菩薩若用軟中品纏，毀犯四種他勝處法，不捨菩薩淨戒律儀；上品纏犯，即名為捨。若諸菩薩毀犯四種他勝處法，數數現行，都無慚愧，深生愛樂，見是功德，當知說名上品纏犯。非諸菩薩暫一現

行他勝處法，便捨菩薩淨戒律儀；如諸苾芻犯他勝法，即便棄捨別解脫戒。若諸菩薩由此毀犯，棄捨菩薩淨戒律儀，於現法中堪任更受，非不堪任；如苾芻住別解脫戒犯他勝法，於現法中不任更受。如是菩薩所受淨戒，於餘一切所受淨戒，最勝無上，無量無邊，大功德藏之所隨逐，第一最上善心意樂之所發起，普能除滅於一切有情一切種惡行。一切別解脫律儀，於此菩薩律儀戒，百分不及一，千分不及一，數分、計分、算分、喻分，乃至鄔波尼殺曇分亦不及一，攝受一切大功德故。

如是已作受菩薩戒羯磨等事，授受菩薩俱起供養，普於十方無邊無際諸世界中諸佛菩薩，頂禮雙足，恭敬而退。

又諸菩薩，不從一切諸聰慧者求受菩薩所受淨戒，無淨信者不應從

受。謂於如是所受淨戒，初無信解，不能趣入，不善思惟，有慳貪者，慳貪蔽者，有大欲者，無喜足者，不應從受。毀淨戒者，於諸學處無恭敬者，於戒律儀有慢緩者，不應從受。有忿恨者，多不忍者，於他違犯不堪耐者，不應從受。有懶惰者，有懈怠者，多分耽著日夜睡眠，樂倚樂臥，樂好合徒侶，樂嬉談者，不應從受。心散亂者，下至不能搆牛乳頃善心一緣住修習者，不應從受。有闇昧者，愚癡類者，極劣心者，誹謗菩薩素咀纜藏及摩咀理迦者，不應從受。

又諸菩薩，於受菩薩戒律儀法，雖已具足受持究竟，而於謗毀菩薩藏者，無信有情，終不率爾宣示開悟。所以者何？為其聞已不能信解，大無知障之所覆蔽，便生誹謗。由誹謗故，如住菩薩淨戒律

儀，成就無量大功德藏；彼誹謗者，亦為無量大罪業藏之所隨逐，乃至一切惡言惡見及惡思惟未永棄捨，終不免離。

若諸菩薩欲受菩薩淨戒律儀，若不會遇具足功德補特伽羅，爾時應對如來像前，自受菩薩淨戒律儀。應如是受，偏袒右肩，右膝著地，作如是言：「我如是名，仰啟十方一切如來，已入大地諸菩薩眾。我今欲於十方世界佛菩薩所，誓受一切菩薩學處，誓受一切菩薩淨戒。謂律儀戒、攝善法戒、饒益有情戒。如是學處、如是淨戒，過去一切菩薩已具，未來一切菩薩當具，普於十方現在一切菩薩今具。於是學處、於是淨戒，過去一切菩薩已學，未來一切菩薩當學，普於十方現在一切菩薩今學。」第二、第三亦如是說。說已應起，所餘一切如前應知。

懺罪羯磨第二

若諸菩薩從他正受戒律儀已，由善清淨求學意樂、菩提意樂、饒益一切有情意樂，生起最極尊重恭敬，從初專精不應違犯；設有違犯，即應如法疾疾悔除，令得還淨。如是菩薩一切違犯，當知皆是惡作所攝，應向有力於語表義能覺能受小乘、大乘補特伽羅，發露悔滅。若諸菩薩，以上品纏違犯如上他勝處法，失戒律儀，應當更受。若中品纏違犯如上他勝處法，應對於三補特伽羅，或過是數，應如發露除惡作法，先當稱述所犯事名，應作是說：「長老專志！」或言：「大德！我如是名，違越菩薩毘奈耶法，如所稱事犯惡作罪。」餘如苾芻發露悔滅惡作罪法，應如是說。若下品纏違犯如上他勝處法，及餘違犯，應對於一補特伽羅發露悔法，當知如

前。若無隨順補特伽羅可對發露悔除所犯，爾時菩薩以淨意樂，起自誓心，我當決定防護當來，終不重犯。如是於犯還出還淨。

得捨差別第三

略由二緣，捨諸菩薩淨戒律儀。一者、棄捨無上正等菩提大願，二者、現行上品纏犯他勝處法。若諸菩薩，雖復轉身遍十方界，在在生處不捨菩薩淨戒律儀，由是菩薩不捨無上菩提大願，亦不現行上品纏犯他勝處法。若諸菩薩轉受餘生，忘失本念，值遇善友，為欲覺悟菩薩戒念，雖數重受，而非新受，亦不新得。

菩薩戒羯磨文